

Minister Junior Croes na Partido MEP

MI TATA TIN DERECHO DI SOSEGA NA PAZ

No usa lemanan di mi difunto tata pa manifesta awe

ORANJESTAD(AAN) -- Minister Junior Croes ta lamenta masha cu hustamente awe cu ta recorda e di 12 aniversario di fayecimento di su tata, MEP ta tene un manifestacion.

Ayera den conferencia di prensa di gobierno el a muestra cu te awe e no sa kico ta e motibo di manifestacion.

MEP a bisa cu e ultimatum cu a pone cu e manifestacion cu nan a duna a pasa y p'esey nan ta

manifesta atrobe.

Segun Minister Junior Croes, e ta lamenta cu den e manifestacion cu MEP a duna gobierno, nada constructivo ta bin padilanti.

Den e manifestacion y den e conferencia di prensa di MEP atrobe por a tende nan papia di bendemento di patrimonio di pueblo cu Fabela refiriendo na Aruba Wireless Solutions. E mandatario a bisa cu te ainda e ta warda MEP reacciona riba su reto pa nan

prueba cu el a vende patrimonio di pueblo.

Despues Minister Junior Croes a tende cu ta pasobra cu e lo a firma un contract cu Carlos Mansur cu su compania di duna conseho pa 350 Florin pa ora. E mandatario a reta MEP pa presenta e contract aki y te dia di awe nada. E ta lamenta cu MEP kier usa informacionnan falso pa purba lanta Arubianonan contra otro.

Loke e mandatario ta condena, ta cu MEP a scohe net awe 26 di November cu ta recorda e di 12 aniversario di su tata difunto Betico Croes pa haci manifestacion.

Awe mester ta un dia caminda pueblo den un forma uni ta resa pa sosiego eterno di nos

gran libertad difunto Betico Croes.

E ta lamenta cu na radio ta pasando difunto Betico Croes su stem, su expresionnan pa purba lanta e Arubiano contra e propio Arubiano. Esey no ta e idealnan ni e principionan ni e spirito di su difunto tata. Segun Minister Croes, e palabra union tabata central den e lucha di su tata caminda el a sa di uni e pueblo di Aruba pa logra nos Status Aparte. Tempo di e referendum na 1977, mas cu 85 % di e poblacion a vota pro Status Aparte. Esey ta muestra cu e pueblo tabata uni. E lucha tabata contra e politiconan Hulandes y politiconan Antiyano. E lucha no tabata contra e pueblo Hulandes y tampoco

e pueblo Antiyano. Nunca e lucha tabata e Arubiano contra e Arubiano.

Loke por mira awe ta cu e lidernan nobo di MEP ta purba lanta e propio Arubiano contra otro y definitivamente esey no ta e principio di difunto Betico Croes, tata di Minister Junior Croes.

E mandatario a expresa: "Awe ta 12 aña cu mi tata a fayece y mi ta kere a bira tempo pa despues di 12 aña, lidernan di MEP purba haya voto riba nan propio merito. Mi ta haci un apelacion na MEP como yiu, cu mi tata tin e derecho mescos cu tur otro difunto, di sosiega na paz. E ta pidi MEP pa awe nos tur uni pa resa pa sosiego eterno di difunto Betico Croes".